

**■ COLUMNA**

# Nua via, Rumantschia?

DA RICO VALÄR\*

Suenter ils onns da giubileum, saja da la renconuschientscha dal rumantsch sco lingua naziunala u da la fundaziun da la Lia Rumantscha, hai uss num definitivamain per il moviment rumantsch: guardar vinavant! Co duai la situaziun dal rumantsch esser en diesch onns? E quest onn 2020, questa sava al nov decenni, vegn ad esser zunt decisiv perquai che blers vials vegnan drizzads quest onn!

**P**olitica da linguas: La Lia Rumantscha elavurescha ina nova strategia per il nov decenni, ina strategia che duai cuntegnair las sfidas principalas da la Rumantschia e tschentiar inqual finamira e pretenziun politica. Ina strategia che duai daventar, en mes egl, la basa per in augment substanzial dal sustegn chantunal e federal per nossa organisaziun tetgala a media vista. Al medem temp tracta il parlament federal la missiva da cultura dal cussegl federal che cuntogna sper il sustegn a la Lia Rumantscha ed al chantun Grischun per lur politica linguistica er pussaivladads da sustegn per projects en la diaspora rumantscha en ils proxims onns. Forsa che noss parlamentar grischuns pon qua anc cuntanscher a curta vista in augment dals meds,



per exempel er per divers projects da digitalisaziun.

**P**olitica da furmaziun: Nossa regenza entaupa ils directurs da las scolas medias e vegn a renovar quest onn ils contracts da prestaziun – quai è ina buna chaschun per profitar da las novas disposiziuns da la lescha davart las scolas medias per pretender ina consideraziun pli consequenta dal rumantsch. La Scola auta da pedagogia dal Grischun avess finalmain la chaschun da metter sin buna basa la diplomaziun da scolasts secundars che studegian a la Scola auta da pedagogia da Turitg.

**P**olitica da medias: RTR Tschertga ina nova directura u in nov directur e sto occupar da nov divers posts en ses gremis. La FMR ha chattà l'onn passà sia nova furma, in nov cussegl da fundaziun, in nov schefredatur. Damai vegnan er nossas instituziuns medialas a sa fatschentiar

cun dumondas d'orientaziun strategica.

**D**amai: Nua via, Rumantschia? Co pudain nus sustegnair vinavant la transmissiun intergeneraziunala da nossa lingua? Co pudain nus garantir vinavant ina buna scolaaziun rumantscha? Co pudain nus promover vinavant ina vita culturala multifara? Co pudain nus garantir vinavant ina preschientscha dal schurnalissem scrit ed audiovisual? Co pudain nus pretender e survegliar ch'ils dretgs da protecciun garantids a nivel chantunal e federal vegnian efectivamain realisads?

**T**ut quai èn premissas indispensablas per mantegnair la substantza rumantscha, per dar al rumantsch la vitalitad, l'attractivitad, l'utilitad ch'i vul per ch'el vegnia discurrì e dà vinavant. Perquai concernan questas lavurs strategicas nus tuttas e tuts – e perquai è impurtanta la discussiun publica. Dentant èn tuttas strategias vanas sche nus na drizzain ils vials er en nossas vitas personalas ed en noss engagements individuals uschia che la via per in futur prosperant da nossa lingua saja libra.

\* Rico Valär da Zuoz è professer per litteratura e cultura rumantscha a l'Universitad da Turitg.